

四庫全書

集部

欽定四庫全書

集部

方洲集卷六

四至

詳校官編修_臣曹錫齡

中書_臣劉源溥覆勘

總校官編修_臣王燕緒

校對官編修_臣嚴福

謄錄監生_臣宋昆玉

欽定四庫全書

方洲集卷四

明 張寧 撰

五言古詩上

題所畫鷄鵝圖二首

昔我懷父母初鳴即晨興
一從侍清禁出門始聞聲
烹膳日已遠起舞欣時平
膠膠風雨宵寤寐傷餘情

獨行澹無儔拳立如有待
饑唼水中蒲渴仰石邊瀨
寧

金史四庫全書
卷四
隨鷗鶯閒不伍
鳬鶯態山陰
久蕭條毛羽復誰愛

方洲八景八首

柳塘春雨

新柳繞芳塘
柔風送時雨
潤草及西堂
增波接南浦
得句起遐思
贈別懷舊侶
回首灞陵橋
瀟瀟幾行旅

杏園朝霞

春深花正開
天晴海初曙
霞光雲際來
豔色溢蓬宇
明碎錦坊
淡淡秋容圃
聊因旦晚歡
妍麗安足數

蓮池疊翠

池中荷欲花池上水初漫初看水上微旋覺香不斷一曲密藏鷗萬柄嬌倚岸莫唱採蓮歌江南時節換

麥隴翻雲

時平田里安麴麥被丘隴芄芄翠浪翻蘄蘄綠雲湧肥磽力雖殊刈穫日可拱欲賦兩岐歌周詩更堪詠

稻畦垂穎

農人告方及秋事忽已成黃雲被田野白日寒光晴父

老喜豐年鼓缶過我行平生任經理對此餘深情

菊徑凝香

田下去來久三徑行復期采采黃金花照我頭上綠含
英抱幽馥佳會良在茲羊腸九折坂蔓草應正滋

梅林雪霽

閒來好幽事值此梅雪晴深林百草盡野水寒煙生怡
然發孤笑婉戀有餘情冰霜六七載永念孤山行

竹塢晴風

菜竹蔽深塢歲晚多陰風愛此旭日喧萬玉搖玲瓏吟
眸展清眇倦耳生餘聰因之懷勁草聲色吾何從

贈陸汝謙

吾聞古神鑒秦越扁鵲氏洞識陰陽機妙達天地秘生
人無前功用術陋專技遇婦作女鑒遇幼擅童稚或以
傷疹稱所用隨所至一一底工巧何慮千古計古道既
云遠時鑒極流弊造弓不顧甲治外不恤內仁術化忍
心人命可輕試汝謙陸先生三世名家裔動有古人風

一洗庸劣氣余生坐迺蹇有子方兩歲乳哺失調攝疾
病遄以繼驚風搐四體魚口雙目閉羣醫競歎息束手
坐相視先生徐徐來駕言勿驚悸下榻夜尚遲從容解
金匱一投邪風疎再下壯熱退三服乃如常下牀作兒
戲幽谷陽春回大旱甘雨降中年復有子無乃仁人惠
作詩表深功庶以將薄意

寄謝濬僧官

濬公夙儒雅自少偶業白天空一鶴舉海濶閒鷗立平

生怯詩魔老拙降未得清高逼休遠典雅超復泐虛堂
戛鳴球清嘯聞月夕前年被徵薦浮杯度京國櫟櫟厭
青黃塵泥混空色明珠墮濁水皓鏡懸土壁昔忝青雲
交今逢白頭客頗憶去年春正卧投老疾清風故人遠
舊雨深巷寂空谷音方隱月門敲正急苔階印隻履蓬
戶卓爾錫欣然起相攜羈爾冠屢側吹燈照殘夜對酒
忘疇昔歲月能幾何離曠非一日烏兔互馳逐子亥忽
流易元正十月初復此得消息緘書遣高第慙慙問眠

食春林白團茶秋圃紫苞栗儀多物兼備歲去情轉極
時來得顛印自愧非愈軾再拜送來使開門日初出向
來車馬路草長沒行屐

對雨

草木已時萎時菊方敷榮林空晚色淨日暮孤煙橫仰
蔭修竹枝俯挹蒙泉清歲月忽復易採擷傷吾情

畫雲鴻振羽圖題送陳掌教

東方有佳士文質何彬彬昔為待沽玉今備充廷珍朗

誦商周詩默會義文神
言詞夙華雅步履彌精純
初疑鹿鳴晚為感鴻飛
循江干寡儔侶磐石多來賓
增墩既云遠稻梁安足勤
進止各有節險易常相因
絃琴古壇樹載藝清池芹
晷茲十年來漸覺寒氈春
陵陸日已邁達路日已臻
祥雲動四表孤征戾中旻
奮逐鷗鵬風揚隨鸞鳳塵
戕戕金闕樓溶溶玉河津
刷翎補干羽萬舞儀章新

愛蘭

稟性無俗尚愛此山澤芳拔葵藝周圍分植置中堂入
室有佳士紉佩非私裳時好豈足貴德馨諒難忘

重畫雲鴻振羽圖題贈王良臣

翩翩漸鴻羽一舉從江干再舉次磐石三舉逢平原升
木良有得陟陵竟無患不願騰上遠但願遵飛安祥雲
動四表天遠浩漫漫孤征戾中霄振翮偕鴛鴦聯行兩
階下儀羽紛迴盤雲深日五色萬舞充華觀巢居懷往
事凝望起長歎

送別沈履德

園花發朝豔谷鳥遺春音豈無旦夕佳倏忽流光陰幽
居寡時好感子時過臨冥言啟孤憤高步超煩襟夙昔
懷遠道遙別悲來今對酒不及醉眷此故情深

雲谷

閒雲翳空谷日夕生幽陰中有高世士結屋雲之深飛
錫天外風潤澤寰中霖貞居聊自適變化吾何心

正統戊辰聞福建感而有作

平行說荆淮險危聞隴蜀奈何吳魏間漢氏猶鼎足況
茲三山地鼠竊弗盈蹴憑陵肆劫壞鷗義殲人族譬猶
負隅虎據險勢莫觸食盡無後援鼎俎咀其肉復聞聖
天子推心置人腹渠惡疾見尸醜類將自服賊死匪所
歎致尤何太毒

見雨雪歎戊辰冬

日夕將天兵聞已度淮水黎庶仰虹霓雨雪何不止北
軍利高亢值此非所喜行師有紀律日須五十里南風

吹鐵衣卻走泥沒趾鏽澁劍鋒回壓疎弓力弛況不便
舟船經涉殊未已指日布陽春頑陰悉飄委

王師至浙人情恟懼感而記之

厥哉南閩賊遠冒明王師軍聲動白日淮海相逶迤羣
縣務馳逐民底日何疲兵車恣橫決帷箔不可支豈知
陽春日堅冰乃相隨我聞行師要愛須威克之馬嘶不
敢驕況爾部下為天子有休命借問大將誰

懷恩樓為王宗勲賦

萱草生北堂朝見夕已萎慈烏返故巢鳴聲一何哀感
此時物喧悠然動遐思況當慈母沒緬懷耿嗟咨赤子
將入井安能悟乖離營營願襁褓依依眷孩提周全乳
哺艱三年免於懷宵縫念兒寒晨炊畏兒饑遊子日已
遠母心增傷悲殷勤二十載為子有室家奈何白日晚
流光忽西馳明月照高樓疎櫺起涼颼徬徨中夜長俯
歎淚交頤慨彼泉下人相見未有期

劉公覲畢姻詩勉之

飛飛鴛鴦鳥比翼湖之涯生年不滿百燕婉當及時東
隣有處女春秋盛容姿一朝辭父母托身遊俠兒豈無
百兩將而乃蕩子妻妍華不自好終身抱餘悲況君良
家子衣冠能自持母窮畢日歡負此遠大期辛壬與癸
甲斯文良在茲

答姜文進

瀾瀾江中水黯黯江上樹眷彼同心人胡為忽異處駕
言從扁舟積雨不可渡願隨雙黃鵠庶以相會晤

贈柴取中

東風扇微和萬卉數春陽
盈盈桃李花爛然競容光
綿綿路傍草根株亦交相
及時起涼颼零落隨秋霜
爭如谷中蘭清標壓羣芳
雖無豔冶姿而有冷淡香
奈何歲華晚保此故意長
傷哉綠綺琴紉佩羅衣裳
視彼同心人德音實難忘

夜宿斗門與朱氏原兼呈再從叔

予生二十年始解訪同族
緬想姑祖親悲喜相交屬如

何百年內情好復斷續登堂思高曾入門拜伯叔弟妹
相驚呼問是幾世服源遠末益分膏澤猶未沐傾家出
相見喜氣溢腸腹場頭未黍登牖中酒醴熟端不為盤
餐聊以慰情曲我本季世孫今當遠行役生年能幾何
歡會寧可復同姓古所敦去去勿塵俗感激忠孝心因
之以相告

林居秋興

涼風起天末新涼入丘墟晏坐當前楹陶然讀吾書俯

卷四
視庭草萎仰看浮雲舒山氣日夕佳灌木陰以敷軒冕
豈不貴而樂自有餘願子保令終因之相與娛

挽鍾處士

丹山有靈鳥文采相頡頏饑餐瑯玕實渴飲瑤池漿清
音諧韶樂錦羽暎朝陽飛飛燕雀羣俯仰被餘光顛風
折梧桐鳴鳳忽摧傷孤凰抱哀思輯羽不復揚徘徊念
同侶軀命倏銷亡翩翩九苞雛覽德岐山岡皇皇奮南
征哀鳴激中腸容華不自愛寧辭闕塞長死者不復生

龜麟總茫茫願言勿殘毀阿閣正相望

黃主事挽詩

聞有高世士築室章貢間弱冠失父母門戶一綫懸獨立無人境巍然亘前山起視丘垤羣坐我千仞巔娶妻良家女生子當世賢煌煌五色詔星星雙鬢斑如何兩楹奠一夢起長歎傷哉同室親軀命不復延泣盡繼以死攜手入重泉嗟彼未亡人區區何獨難

永思堂為劉廷賓賦

哀門歷多故生當元宋間高曾及祖考累世事更遷風
塵浩無際兵車日亟喧羈危不自保趨走恒窮年喪亂
忽已平營業亦周旋歡娛不經目憂傷閔重泉昔常念
寒燠高居複華裯弱息久窮嫠兒女日以殷緬懷顛沛
時門戶朽索緣湍流一解手宗祀付沈淵於焉涉艱阻
迺欲遺曾玄胡為祔衿餘雙親中道捐遠慕已無日近
哭悲終天滄波渺東注白日中霄懸悠悠穹壤間遐感
何時諠

藝蘭為王本誠作

猗猗谷中蘭言藝君子堂過門不入室彼美自芬芳彈
冠結素履振策循周行我心慙如饑覲止諒已降容顏
挹清潤言笑聞馨香同心未卒語欲去仍徬徨眷戀終
日夕賓主已相忘

滹沱冰合圖

人心久思漢帝主自有真多難啟弘業獨此邯鄲人窮
蹙白登園倉猝滹沱水河冰縱不合先武亦不死

蒼松軒

種竹繞軒居清素聊自愛雖無桃李顏不改冰霰態孤
松色不殊六月寒尚在倏然三徑幽凝碧如有待

為姚公綬題丹丘

東方有奇士自號丹丘生超世立于獨宛若來蓬瀛言
從黃石公再從赤松子終始意斯在幻境焉足跂

友蘭

公門盛桃李世路多荆榛溫溫愛蘭交吾思見其人伊

人日已遠比物不盈畹同心澹忘言歲月殊可晚

梅古春壽藏詩

鬱鬱鳳凰山生氣何連延有美清修士遺世希神仙高
情出茫昧獨見超虛玄仰瞻山木花俯視重岡旋鑿石
啓幽閔種櫝待芳妍夙懷瑕丘樂預見佳城懸聚散本
元造壽夭誰能專橋山有高塚王喬亦遺阡乘鸞與跨
鳳刀圭終棄捐何如一生死坦率窮高年

武澄夢萱卷

母在萱自好母亡萱尚存蕭疎北堂下花葉空晨昏盈
盈眼中淚默默心上酸眼淚猶可拭心酸傷肺肝安得
百丈根沿情及幽原

怡菊周德輝卷

嚴君去云久手植已成荒促憾遠行歸顧晒心徬徨言
難蔓草蕪再汲清池潢玄功不遐棄時及仍芬芳故物
幸茲在慰悅如有將見此聊相慰笑舞欄斑裳

畫舫清游

摇摇書畫船渺渺三江水朝披越嶠雲暮聽吳門雨高
深洞玄黃招邀盡青紫所愧子長遊吾行未能止

草蟲雜圖四十二首為伍僉憲題

何人涉江採得此霜前芳花殘見晚色葉淨流潭光長
路遠莫致故意不可忘欲輟畹中蕙共佩羅衣裳

南山有佳色束籬閒無人朝為頭上花暮作車下塵誰
與念恒節培植當良辰落落竟何語把玩聊相親

脩脩苦竹枝歲晏未凋謝絡緯繞其顛促織鳴其下秋

聲入荒林寒氣逗虛榭何人賦無衣悽惻坐長夜

漏石倚空蒼弱草颺殘碧眷彼飛來雙栩栩飄復集鴻
鵠志萬里松栢挺千尺洪纖各有定非分焉所得

么紅雨餘葩疎綠風中篠雖無尤物麗得借此君好栽
培良有待開落恒可保嗟彼桃李花采折隨媚草

形色已歲垂風神未蕭瑟所愧落英空還思舊根發時
來已若茲歲去猶爾若殊勝汎相逢隨人滿頭插

茵陳欲成蒿靡蕪亦云謝水漲污耶深時蟄看已化纖

腰尚蛺蝶弱翅舉復下婉轉如有情追逐不能罷

暑雨滋宿拚五月南風生時當長養節奮臂將誰撓奔
轍豈足當黃雀方營營幽居事玄穆相對悲羣情

塵境何擾擾草野何茫茫清泉白石處幾許堪徜徉蘭
荃既榮秀萬猶絕交相宜人不在多百畝空蕪荒

今日胡不怡過眼青春空紛紛蕭艾中見此萬綠紅蜻
蜓從何來當午停芳叢物情諒有得吾意亦從容

飛蛾值芳時飄舞來復去因風快循繞逢花亦延佇雖

臨撲逐威不解推掠慮人意久安閒相忘不知處

尺蠖已辭繭橘蟲方化生天天隰上枝碧綠紛敷榮覆
載大有造動植各相成天機一流動幽思穆無聲

趯趯草間蟲芄芄石邊蔓跳躍煙冥霏飄飄翠雲亂時
當綺牕紗或近青玉案卑微寧足論寂閒聊一眄

野草綠滿地無名自纖妍不采亦不夭幽與閒相便光
風濯靈雨蛺蝶來翩躚咄彼周昉圖百態空騷然

晚家南山陲獨卧西礪草牛羊所不踐樵伐非故道葉

落秋蛾稀苔滋候蟲少煙消夕陽下林薄淡如掃
蜻蛉多品類此種最靈黠翅翕尾低垂暫息即飛越頗
憶童稚年撲捉傷暑熱至今圖畫間隱手欲輕躍

清霜萎茂草天以蟲鳴秋股動羽亦振隨處聲啾啾書
齋閑疎雨木落青燈幽掩卷不成誦感物令心愁

草振蝶雙飛蝶下草交動無情如有情形勢偶相關貌
與心不親情好久焉用悠悠笑相逢栩栩莊叟夢

露白水花紅江空草煙暝閒鷗忽驚去見此孤蚱蜢吐

沫禁無聲卑飛水中影蟲沙與損鶴由來未深省

飛行罕同儕性質好幽處點水緩捎花乘風暫停午疑
回晴屢移斂息翅頻舉慎爾遇貪夫求珠瘞當戶

短翅不高飛長跼不善走跳踉並蠟螽局縮居澤藪三
孱不滿隅匹處竟無偶彼亦何人斯蠢爾亦可醜

園蔬葉垂盡練裙弊無餘輕揚雨飄翅清嗅雙長鬚本
質夙如此變不忘其初襴斑五色文支離守荒蕪

浙瀝蒹葭雨依微楊柳煙翅薄輕紗過晴隱硝珠圓寧

當狎雌絜莫受蛛絲纏與物本無患陳生有遺篇
陰陰莞柳樹嘒嘒孤鳴蜩驚風颯吹撼奮翅飛遷喬托
體雖得所防患亦須周吟風飲清露此道終逍遙

文蛾好明死烏鰂以蔽彰爭如草上飛無用亦無防渴
飲零露華逝借晨風揚何如蜉蝣羣朝生夕云亡

春林盛朝爽秋圃有暮色蕭疎叢薄中緣沿何役役鳳
鳥不時見良驥須遠厯斑斑被體文甘老榛莽澤

蒼茫青草池霖霖黃梅雨清冷脫滂下潤澤非斥鹵鳴

聲慎煩聒跳躍宜審處臨深縱無危坐井非善舉

去彼蜣螂穢超居風露清蛻囊半未脫健臂已前撐潛
蛟起泥滓厲礪登瓊英大小分已定變化同其情

蟋蟀已在堂鼠婦已在室涼風蕙草時胡見幽陰物倉
皇若無依短褐露肘膝天荒歲年暮感此三歎息

露滴葡萄寒宵鳴一何急鷄啼天欲曙絡緯不盈尺深
閨有思婦遠道多倦客驚聞長夜聲掩淚心促刺

景物此何處野塘秋色中山花驚暮雨蘆葉抱寒蟲曠

望知誰到幽居重此逢懷人不可見雙鬢感飛蓬

金谷多奇花蝶滿謝即去荒園久空疎蠶蜨亦安素遲
回杞菊秋栖息松桂暮所以君子交清澹只如故

原野多蔓草墟澤饒魚蟲一枝與一體入筆殊元蹤生
憎紅紫態未覺丹青工坐我林塘下衣袂生華風

風高蘆葉殘羸露失其翳鳴蜩已絕響猶奮雙斧臂猶
豫多積疑蜂蠆無卻慮君子尚勇決成敗焉足計

飛來錦紋蝶采翅何翩翩山花吐碧蕊相映亦相妍動

植互生化寒暑頻推遷生綃有遺跡日日當吾前
蝶有戀花情花無留蝶意東風三月時總為春流麗還
開亦還落欲去還不去默誦過牆詩重門草深處

意會自成趣景觸良宜時過影如見人飛音若我遺荒
閒寂寞濱獨悟勝羣思此興復不淺名物空何為

爾雅列名稱埤雅伸疏義恢恢造化功獨此亦難備況
當畫史傳舐墨隨手至驪黃牝牡間不必問形似

動聽非評語適目無妖妍詩求句律外畫索丹青前尺

素竟何物居然得天全相彼能事者殆欲忘朱鉛

樂水不論船樂山不問樹不求畫中物惟耽畫中趣想
當含毫時粉墨不待具眼光落縑素但覺風雨至

滕王去云遠謝逸今何之形迷有聲畫影落無聲詩低
回羅扇風旋繞簪花枝轉眼忽不見芹香滿清池

形色既有托音聲寂無聞乍出草莽中昂藏若離羣涵
濡竹露華飽挹山花薰時哉忽如許彼美空云云

沈啟南雲山圖

晨興具壺榼言往山中遊倚棹陟崇岡舒眺寫我憂陰
雲翳四垂舉目迷巖丘人生百年事行止天為謀懽榮
間悲辱強半成淹留眷茲山水懷所遇亦已酬自從混
沌鑿土石窮雕鏤鑄堅伐危厲輦築連窪湫幸此玄黃
間元氣常通流時當巧麗餘忽與鴻蒙遊行看晦暝甚
轉覺巉巖幽情景兩相化風雨飄虛舟

吳德翼永思詩

天天巖下椿嫩發方自好終風激零電凋拉何太蚤傷

哉三尺孤形影為枯槁虛室若懸磬遺業忽如掃遑遑
二十年賴此王父考昔如風中蓬零落隨野草今如轅
下車奮脫即遠道登堂泣孤幃陟岵見歸鳥榮枯不相
代憂傷已終老

送歐員外

薊城有名士美盛元無前手抉雲漢華身交文錦妍目
爛明月珠口湧懸河泉幽思入玄默清臭紛蘭茝初辭
鹿鳴宴再生瓊林筵朝主地官事暮副郎中權騏驥志

萬里鴻鵠懷高騫良金與美玉適用無停延遥遥吳越鄉雨滂如堯年雍雍少司徒王命來旬宣行哉自求輔得此堂中賢六屬倡九牧一士當三千蒙衝籍篙楫裨曲嚴中堅激揚水趨壑鼓振雷行天鈞衡賴持舉皇度資純全遂令泥滓民復業膏腴田一朝十二解芒銳猶森然裴向多諫議之問餘詩篇時登兩峯月暫汲西湖煙雙旌即歸路一束攜行編加餐赤日飯穩著青雲鞭行舟如有問幹事江南旋

為胡文暉題幽篁石菊圖

故人歸田園幾許見秋節修篁蔭中林時菊叢以發
冉煙中花蕭蕭石邊葉秀色如可餐幽馨寒不絕時有
素心人同來醉明月

何都憲一樂堂

椿萱茂遲秀棠棣偕春芳煌煌錦繡衣熒熒斑斕裳恩
封日以至甘旨日以將齊眉粹榮養競爽時行藏載歌
蓼莪詠載誦鵲原章前修有遐感而我承餘康欣抃不

能已萬事真相忘

叢蕙圖

二月忽已邁庶草三春時九畹有餘秀百畝多芳蕤光
風轉幽馥湛露增華滋質管拂琨璞揭車被留夷朋從
暈如故氣質相交麓手撫宣尼琴再誦騷人詞時哉未
終老蓀芷來何遲

凝香閣畫菊

幽齋絕穠紛時菊閒以潔少好淡春芳敷榮及秋節鬢

鬢寧爾粧袂袂無所擷枯索繞殘枝天寒滿庭月

清燕室畫菊

佳節良易邁貞姿益清芳根依昆玉固色並淇筠蒼終
忘白衣酒特立金娥霜幽馨不出戶憔悴含餘香

一山為沈允秀才題

人言一拳石積累成豐隆為山將九仞簣缺虧前功魏
巍聖與賢養正由童蒙登泰小天下卓立超羣峰

和陳憲副掃墓詩

遊宦日已久先隴多違離寥寥古東門值此洪流時顏
垣走狐兔宰木寒無枝及目心隱只俯仰淚交頤野祭
已非古況復無恒期恩封夙有澤貧喪空無施徬徨不
能返日落淒風悲

南山榮壽詩壽楊方伯父怡梅翁

維南有崇山盤亘自終古高當翼軫間廣與衡嶽旅中
有千歲梅生長元得所英華徹寰區貞素貫寒暑開花
玉香叢結子金色顆德馨椒桂儔滋味鼎鼎主繁葩盡

芬馥再實愈清楚榮封異秦松拔萃超庾土上與山同
躋下與地常處蟠桃與莊椿千歲可能數焉知世奇樹
億祀老玄圃卓哉同春翁怡怡並遐祜

四月二日西湖再汎四首

春去纔一日天宇尋清和湖草猶碧色湖水餘澄波安
能對佳山不飲空嗟我隣船留宿懽皓齒發清歌推牕
動孤笑吾意其蹉跎

沿舟望湖亭躡屐栖霞嶺孤山久寂寥荒塚鬱清迥渚

蘋清不香湖水渾未瑩悠悠登薦心長歎逐遊泳

樂天唐詩傑子瞻宋文豪平生宦遊事山水遺清高何
人繼芳躅保障心思勞坐令百折堤土木連平臯雖無
百年固已足千金牢茫茫蕩遊子醉謔空嘷嘷

西湖天下奇登泛極寒暑晨行暮酣歸昏遽一如許何
殊浪遊客對此汎交主面接情不通日醉鷄與黍誰哉
神識高偕協如索與茫茫丹青家忽忽歌曲侶安能千
日遊玄晏坐風雨

為仲彥暉題戴文進畫

故人歸田園風景如未別時菊老餘芳疎篁戛高節皇
皇枝上花瀟瀟石邊葉安得素人心清尊對明月

為徐公舉題甘谷圖

南陽古甘谷菊繞淵泉清居人飲其流白髮咸康寧明
徵諒無爽穆穆中庸生君當衍餘澤為我延頽齡

陸汝嘉慕橘

伯父去已遠遺植森成行哀哀撫育恩見樹生悲傷所

愧為人後凋落速前芳願言慎伐剪念彼椿萱長

畫舫清遊卷

摇摇書畫船渺渺三江水朝披越嶠雲暮聽吳門雨高
深洞玄黃招邀盡青紫所愧子長遊吾行未能止

松泉為朱彥明賦

亭亭山上松挺挺凌雲標涓涓山下泉混混東歸流根
源夙有托高遠羣無儔洵美山中人寓跡山之幽栽培
與盈進比則事藏修朝登玄鶴岑夕汲青蘋洲巢居漱

芳潤亦足忘吾憂

王漢昭招予社友輩賞雪即席紀事

癸丑至乙卯連歲無快雪
新冬十月來晴久猶鬱熱
蚊蠅振時聲雷電迷夏節
晚麥未出土春卉復舒結
老夫坐空齋感此心隱切
仲冬十踰八風緊夜慄冽
黎明未啟戶簾牖光洞徹
庭烏棲不啼竇犬走欲蹶
昏眸眩珠霏短髮耀瓊屑
寒疑銀海翻凍訝玉樓合
昨日方袒跣今晨被重褐
如行炎都深忽上冰山絕
吾聞陰陽機寒

金匱要略卷四
燠惡凌奪天吏秉常運旋幹何太捷事若久旱餘甘雨
大沾洽行期十年豐底用三尺疊故人同老懷鷄黍充
宿業欣開北海尊笑廣南州榻酬酢亂觥籌詎諧連稗
闔罐唱叱鄭妓羔飲詫党妾狂懷錦瑟醉渴罄鳳團吸
客思暝未闌主意夜不輟似有暗香來援毫待明月

蘭竹篇

幽蘭發深谷修篁生茂林托根偶相並香靄凌繁陰逢
時苦不早霜雪紛相侵恥為桃李妍眷懷金石心幸此

平安意起坐絃吾琴

詠張汝庸環秀樓

人境苦塵俗高居山水區
軒楹出岑蔚牕戶凌清虛
左挹羣木華右眇雲煙舒
日夕有佳趣蕭爽真吾廬

玩芳亭

東風吹野花秋雨敗蘼草
彼美亭中芳靜植恒自好
堦蘭閒更香籬菊淡如掃
我欲掇其英幽懷不堪道

小蓬壺

弱水不可航神山未知處閒居與世隔仙境忽已過百
歲等須臾萬事歸傲睨丹丘信自有大小焉足計

長春境

遲遲松栢林鬱鬱山水窟依依久住人宛宛舊游客人
客不改心山木不改色彼哉同州庸華靡何所擇

葡萄二首

邛竹與枸醬追逐秋風來離宮鬱相望異物紛栽培遂
令涼州牧斗酒遺詆諧傷哉出關卒不及枯株迴

草龍驕正眠
驪珠爛將墮
清露溥花間
涼風生葉下
悠悠日觀翁
蕭蕭友雲者
我欲掇其英
陽春和應寡

楊廷憲修障海塘妙得古法但百世之工非朝夕
可致所冀增高倍厚堅表實裏遲之以歲月庶
可持久詩以寄之

吾聞浙江潮涌撼世莫比迴流趣鹽官一射數百里海
鹽當其衝適際東北趾何年作長防去郭數丈許疊石
類懸崖壁立瞰其溪剗中實外障高岸湮入水表裏河

海間相隔纔一指譬如潰瓜形皮好肉已毀潮來石奮
角潮縮石拔齒時平漸離缺風迅速披靡工役歲無涯
漂蕩日常耳皇皇魚鱉民藐藐軒裳子剥牀不及膚解
牛未得理豈無達務才遺我徒好語使君人中英萬物
備一已詢咨度豁如瞻顧心隱只秦鞭竟空談漢絙無
用此軒然巨鰲側坦若長坡迤嶇漏互蔽虧力勢相併
倚盈不與潮鬪縮不隨浪委肉厚骨不疏腹飽背復僂
何期既倒闊忽見急流砥但恐迷者能不類創智美速

成功易墜舉重力易弛安得百使君歷歲如大禹

水南別業四首

幽居異前業喜無塵俗喧東風扇微和忽此春事繁
遊魚汎深沼好鳥鳴簷端布穀正及時呼童理荒園
羣動各有為予生固多般感之欲自見對景已忘言

遠村暑氣薄衡門絕塵鞅禾黍滿污邪松篁翳林莽
富貴復何心琴弈偕所往起誦康衢謠悠然發遐想
薰風自南來坐我羲皇上慨彼河上翁所樂異天壤

夙昔愛林壑遂懷泉石居下焉安所適上焉荷唐虞無
窮畢日歡恥與放浪俱此意不自昧付之耕鑿餘秋涼
入林薄時復課兒書先民有遺詔經訓乃苗裔

白髮念婚嫁此慮已陶然匪復事生業烝嘗詎能捐悵
望終南山緬懷清渭川良時易流邁窮約心所安嚴陰
閼深谷飛雪層崖巔引酒聊自酌被褐終五年

為邵同府題山水圖

秋風吹亂雲涼露潤修竹林深楓葉靜石爛雨苔複青

山斷平野流水瀉虛谷
莞彼山中幽悵此暮行獨
希聲振清灞灝氣凝遠目
澄光發精爽空翠襲巾服
時看夕鳥舉偶晤春莽宿
功名忽如遺志念聊可復
俯視塵中人擾擾隨轉轂

沈用權月桂圖

月中有奇樹百丈何龍璫
歲年等蟠桃膠結扶桑同
下垂白玉苞上發黃金叢
翹翹最高枝花色頰霞紅
我昔至其所顧眄迷仙蹤
高攀不可及屈折聊相從
歸來抱

餘韻歸鴻蒙一登閭闔門再致崑崙峯芬敷及朝
槿斷謝隨秋蓬至今懷袖間斂縮心冲冲有美青雲彦
飛策凌虛空逍遙廣庭晏々于嫦娥宮含咀玉杵霜披
拂纖阿風手持斫月斧氣吐經天虹奮掇連根株五色
俱收籠拔茹採葑非類舉無遺功願子即長路吾行已
途窮

送陳彥章還溫州

悠悠遠行休忽忽垂老別一去湖山空百會親故絕涼

風吹鬢絲顏意各慘切永畢同心歡忘言共明月

朱彥明新居

椿庭日已遠萱室懷深憂豈不念故廬聽此行道謀嗟
彼喧譁區居子非良繇一勞堪久逸三遷遂吾求經營
與締造冀足光前猷正震卓跂立旁居翼相周祠室具
遵豆齋閣陳箕裘南榮叙親友北堂薦時羞苟美載論
語過侈遺春秋慈顏日遲暮良偶方微柔房闥肅清密
戶牖森綢繆聲色起淫蕩勢利生仇讐禍福相倚伏貧

富潛周流君子常抑畏小人肆張譎孝弟與忠信自足
禦戈矛升堂有端士入室無狂浮不見陵上柏遠翠凝
疎標不見路傍桃妖艷侵行眸居養易移習內外須交
修願保安宅固千春永餘休

為王瑞之作雪圖附詩以寄

歲序行已周天寒日將暮門戶了無營山林闐如故彤
雲被層空時雪紛已墮玄冥滌羣華過眼一純素風恬
晚聲寂古氣塞牕戶貞居久遺曠值此忽起悟呼魚煙

外汀沽酒橋北路烹鮮酹華月
婦子環榻坐清歌振冥
寂真態忘陋固悠悠百年中
清賞亦有數勞思竟何裨
快意欣所遇猶懷見晚餘
流想鴻迹去望望剡溪舟
蒼茫是何處

畫元章拜石圖附一詩

吾聞周人拜九辯各有則
空稽猶簡易振肅儀已極
禮達百不煩力致一可惜
蘇卿抗匈奴鄭從厲絕域
亞夫辭介冑汲黯服長揖
生死不移寵辱安所恤
云胡後

來者軟媚等難劇望塵伏牀下不復論曲直黜以諂公
卿愚以祈老佛頽流逐靡風掃地盡古迹元章夙奇蕩
動止異俗習強項難苟俛捫膝不輕屈自從辭君親久
不為是役落落無為鄉寥寥不齊邑伊誰與為禮見此
孤立石岷焉松風生隱只雲霧出踞如猛虎化厲若老
蛟蟄彷彿入魯廟正我緘口客又疑千秋亭翁仲失其
一終知混沌鑿倏忽委靈骨欣然命袍笏雅拜情孔適
物我了相忘恭傲臆無隙清狂詎如許深意將有激全

勝彼昏人僕僕賈危慝但恐違中庸行怪不可率

趙千里小景二首

庭院寂無人冥懷共誰語和風入蓬戶桃李似無主妍
華豈足憐幽曠真足與呼童抱瑤琴靜對松篁雨

茂樹蔭碧草莓苔連砌青山童擁蔽簾灑掃當前楹行
吟白鶴詞坐覽黃庭經良時苟未邁笑傲終吾生

張叔厚謝安淵明圖二首

度量本知識器局先文藝欬笑息羣嗔冷汲止餘沸優

游別墅基閒逸東山妓時方競名達出處有餘地
翩翩晉徵士夙志山與澤心遠趣自高松菊亦何物
酒不身致況此名利役冥鴻在萬里豈為督郵迫

袁可弔風水永懷

皋魚感風木立哭悲其親哀哀千載下予復同茲辰
林木一何多天風一何疾本是無情吹能令有情泣
風水有時息逝者無歸期依微耳中響綢繆心內思
心思不暫緩歲月忽已遠落葉下庭闌山荒夕陽晚

為吳玉甫侍御題芙蓉圖

志士懷寂寥佳人念遲暮
本與秋風期不悟春已去
嫣然如有情暄妍發寒素
紅搖碧潭水綠掩黃葉樹
垂垂翠帳煙冉冉錦城路
試問涉江人相思在何處

方洲集卷四

欽定四庫全書

方洲集卷五

明 張寧 撰

七言古詩

寶劍篇

干將在匣神鬼驚
土花繡澁含蒼精
千年地下靈不死
萬丈燭天牛斗橫
壯夫入佩心相許
唾手功名輕一縷
倚天長笑氣食牛
誓斬樓蘭掃塵霧
歸來獻馘朝宸旒

奮言先落佞臣頭
河清海晏頌聲作
乞身復向西山隄
我歌寶劍聲如吼
颯颯英風生兩肘
丈夫作事貴軒昂
肯向蓬門甘老醜

和孫廷珍侍御短檠歌

中庭燒檠多更長
金缸列錢繞屋光
紅熒朱燼耿欲滅
酒酣試問西堂涼
美人矜醉炷羅帶
照拂氍毹鋪繡牀
東隣少年曳裙客
收束韋編二三策
呻吟佔畢短檠空
光青夜寒秋月白
佳兒在後翁在前
轟雷震起雙龍眠

鳳膏不復延驕恣綠幕綃紅煙掃翠短檠猶照舊時人
翻惜長檠便淪棄

送張永清下第南歸

長安花落鶯聲老送別都門心草草白壁由來惜暗投
俗眼相看不知好讀書十載未成名落日辭家仗劍行
飛騰已遂丈夫志離別無為兒女情黃金高臺挿天起
臺下行人思郭隗千里元從駿骨來躁進紛紛徒已爾
負郭田荒草蔓滋搜不停機妻不炊一朝唇頰驚六國

腰間金印何累累縱橫遊說非吾有汗簡功名在人手
干將未出獄中泥猶有神光射斗牛出門有碍情悽惻
不是長安看花日進退枯榮事偶然欣戚何須動顏色
冠蓋相逢自有期君歸應惜少年時浮雲流水天涯路
回首令人千萬思

題釣魚圖勉許瑛

生不見渭水漁翁髮垂白欲事綸竿死巖澤一朝天子
夢中求兆協非熊年八十又不見子陵垂釣富春山萬

事無心天地間客星一夕犯帝位羊裘擁入鷄鸞班古
人出身有如此却笑今人徒已爾生意何須南畝田世
情付與東流水沉汝持身當有為讀書正遇少年時飯
囊酒袋人不數鳳雛麟子真吾師我昔成童遊津學雪
案螢牕自磨琢但願才名播縉紳焉知凍餒填溝壑邇
來蹤跡雖淹留襟懷不作青雲愁丈夫處世貴廓落何
用浮鷗一釣舟

伍子胥渡江圖

壯氣橫空欲吞楚半夜函關出虢虎城中追騎若行雲
泉下孤臣淚如雨江頭立馬寒飈飈江神吐泣皇天愁
捐軀甘作異鄉鬼誓死肯忘同天讐何來老父傷羈阻
艤棹招搖夜相渡百金寶劍辭不收萬石功名草頭露
雄兵一旦下吳臺楚國山河半草萊舊主已隨烽火遁
將軍猶入故宮來秦庭泣血昭王返白苧歌長越兵遠
夫差夜飲欲烹龍句踐宵衣正嘗膽零落鴟夷百戰身
姑蘇麋鹿漫傷神君看楚郢鞭屍客應是吳門抉目人

庚午秋日遊忠顯寺寺僧設酒殽款曲甚至臨別
出畫馬小圖一幅索予賦詩予既被酒奮筆以

寓所懷

房星夜墮渥洼水八尺龍驤就中起一朝職貢入天閑
蹀躞康莊五雲裏尾長牽地香塵浮目光夾鏡寒不流
千金之價不足數頃刻萬里能周遊奚官牽出連錢動
仰首長鳴金勒重烏騅赤兔尚騰騫驪乘黃伏翔踔
玉門關外苜蓿肥黃塵白草相依微何當汗血向沙漠

奮身霄漢隨龍歸

送趙士英下第南歸

薰風五月都門道送客臨岐心草草天涯轉覺故人稀
對酒難忘舊鄉好憶惜隨君歌鹿鳴風流文采起羣英
當時科第已晚出豈謂歲月猶相仍浮雲聚散十四載
華髮青衫走湖海造物嬰兒解弄人連城美價宜深待
蹇余三舉偶春闈西抹東塗空耳為一從竊祿黃門下
幾度懷君滄海湄前年待試留京闕旅館琴尊共諧洽

金印猶遲相國歸貂裘又作還家別知君懷抱世所無
冰甌玉碗青珊瑚平生慨慷伏奇節得失豈肯輕謹呼
竭來浪跡長安陌別隱鉤玄恣抹索下窮元宋上義皇
大者經綸小占策醉酣咳唾落珠璣三峽詞源百萬師
盛唐詩句何冲澹西漢文章宗典彞向人掩口談科舉
不肯低頭隨進取今學寧知古學醇譽則為憂憎則喜
君不見賈生一歲屢起遷鵬上承塵纔少年梁灝登科
盡頭白位望雖遲年八十疾隨美惡互乘除天壤生成

無棄物何況君懷越世才雲霄有路待君來明年五月
薰風動準擬乘舟海上回

為劉濬淵同年題古松圖

雲山高高凌紫空上有偃蹇千年松蒼顏不變太古雪
密葉晴翻長夏風玄蘿紫蔓陰相翳錯落盤根枝著地
月明白鶴誤飛來煙散青牛忽無處由來奇物重冥搜
變化追尋未可留徂徠山下黃塵暮太谷坡前碧草秋
只今廊廟求梁棟梓柏楩楠皆入貢會見巉巖出萬牛

茯苓琥珀皆登用

送仲指揮南還

去年送君春已過花落鶯啼薊門路今年仍作遠遊人
風雪還家歲行暮灤河半夜渡層冰千里淮揚十日程
楊子江頭沽酒宿薊門樹裏聽鷄行到家應近元宵節
細柳營邊新草發刀斗無聲清夜長旌旗有影蠻煙絕
去年攜酒送君時有約封侯來更遲今年復送長安客
卻憶從前送別詩

聽鶴老人雲山圖

東方欲白天冥冥宿雲未斂朝煙生前山後山半昏曉
千樹萬樹迷陰晴淋漓元氣寒猶濕上下蒼茫太初色
房山去後已無人野屋荒林見遺迹

劉廷器雲山圖

風流太守竹鶴翁平生雅重真襄公公方司馬掌邦政
邂逅相見都門中酒酣為寫江南意超忽家園坐中致
清風未許北牕眠白頭持贈東牀壻高堂素壁懸清秋

舉目直欲窮冥搜天高地迥望不極水漠山冥看欲愁
初疑茗溪二三月桑柘連村雨時歇陰晴未定禁蠶天
煙火蕭條來往絕又疑西湖夜向晨朝氛宿靄迷空塵
隔林燈火讀書曉滿地落花風雨春興來欲趁扁舟渡
蒼茫不見行人處鷗波亭上是耶非放鶴坡頭到曾未
連雲天棧亂石灘處處逢人行路難鑑湖盤谷遠莫及
安得此境終盤桓何翁山水真足數此幅由來倍清古
粗毫淡墨意自適未必經營心獨苦子昭舜舉直細工

卷五
元暉彥敬高同風世間能事不受迫識畫惟有青鞋翁
邊景昭畫馬為劉廷器題

隴西邊生寫生者擲得唐時紫騮馬赤驃青驄卻不前
白鼻烏騅價斯下想見開元全盛時海宇無塵戰爭罷
七十萬足錦成陣十二天閑沫流赭從來主管張萬福
底用誅求王母寡民間自可一縑易官裏或許儒臣假
衆中駿逸知幾何此馬翩然空冀野天機只許九方識
骨法直須曹霸寫未辭羈馭欲騰驤步入艱難便閒雅

當時死骨亦奇貨此畫千金如土苴眼前誰是按圖人
肯省秋風漫盈把

為伍公矩題畫二首

晴空澹澹飛鳥沒野水連天月初出人間天上不勝秋
一片煙波夜如日杜陵老病卧孤舟醉倚蓬牕看水流
滿懷瀨思無人會惟有清光照白頭

荒林野樹連高障青山半出青雲上誰分折水下崑崙
一道垂流幾千丈紛紛短髮吹秋風注目可似青鞋翁

高山流水知音少却憶廬山五老峯

為孫宗禮題畫

巍峩泰嶽當空起齊魯蒼茫青未已東連奎壁下平林
白石神鷄鳴灤水近峯砥柱高挿天遠山如礪含蒼煙
就中絕壁千萬仞青蘿紫蔓垂飛泉上方樓閣凌霄漢
疊榭迴廊環赤岸檜柏陰森灝氣深杉松半映嵐光見
依微下界入芳蹊蹊上人家四望迷樹影匝簷晴亦雨
鳥聲當戶歇還啼野橋鳴瀨通幽谷小徑荒涼閉節屋

屋底幽人不出門十年心事書千束清風明月澹悠悠
野鶴林猿寂寞秋英華不與世同泯意氣直欲窮冥搜
雲雷一旦生林壑鳳翼騰霄虬奮角石田花野迹蕭疎
青瑣黃門事軒豁自從恩譴賦西行萬里關河百感生
落日咸陽一回首盡是鄉山離別情今年天上陽春布
賜歸卻踏來時路舊遊松菊未全蕪去日門牆尚如故
北山何必誚移文南畝還應卧白雲曉雨移舟鷗近渚
晚涼開圃鹿成羣從來宦達憐長往得失榮枯共蕭爽

白壁終藏志已非赤松相候真成妄君不見鄭子真平
生散逸無懷民又不見賀季真鑑湖一曲辭朝紳窮通
出處只如此高尚豈必雙朱輪古人風致何殊絕昭代
求賢甚如渴彥博衰微尚入朝仲舒老去猶持節重來
事業不須期招隱詩成欲寄遲亂峯殘雪梅花夜好憶
咸陽西去時

劉緩齋同甲會詩

潞公昔為同甲會四老煌煌盡時貴如何不見布衣人

可是名高絕流輩功名富貴如浮雲眼前誰是無懷民
康衢卻喜兒童語壽域須教草木春太平四海歸皇極
道統光華連出日一百年來養育恩普天率土皆頭白
海濱野老何蕭然風流不讓他人前十人六百二十歲
同甲相看真自憐僧非凡僧俗非俗蹤跡雖殊志相足
珪璋璜瑾與璠璣總是良田萬金玉就中一老何雍容
鷄羣野鶴孤飛鴻丰姿不減紫芝叟文采或遇青藜翁
錦腸沁透金壺墨鬢絲半映籠鵝白赤壁山前醉月明

垂虹亭下眠秋夕江南十月天未霜寒花晚節生餘香
重陽無雨一冬霽十有九日如春陽楚芳老禪好奇事
便托丹青寫幽思相邀同甲赴同盟遇水乘舟陸乘騎
山散野簌充行廚傳觴促令相歌呼林間似有鬼神動
青天湛若星辰孤功名富貴知何有萬事紛紛盡芻狗
千年一度黃河清幾人解飲同年酒古來戊子與甲辰
大小雌雄何足陳清風素節圖中事一笑渾忘洛下春

歐時熙家山圖

我聞廬陵風景天下無孤峯聳絕凌荆吳東南兩山互
昏曉日月重岡森蔽虧龍洲卻過太和縣武峯卓立香
城居地靈宜有傑人出舉目便覺江河殊六一仙翁呼
不起高節清風照桑梓鄉里于今說故家詩書有澤遺
孫子芬芳玉樹被中庭辟易名駒在千里黃甲題名氣
吐虹太微執法心如水遠別庭闈今幾年孤雲望斷舊
山川青陽宛宛白日暮一顧魂魄俱茫然餘情散入大
江水歸夢正落幽林前林中老人年七十面渥童顏髮

凝漆華屋山中宰相家錦衣天上神仙客生兒蚤入鵷
鷺行投老不忘山水窟百歲優游自可期故園風物正
芳時悠悠忠孝大夫事榮枯利達真兒嬉太行山上瞻
雲客應有房陵西去思

聽潮軒

海門蕩蕩天風來雲潮千里如山推空雷隱地雨將作
萬鼓齊伐車喧祿初疑羣蠅爭振翼忽若洪爐沃湯液
風迴籟歇如漸遠兵馬蕭蕭走勅敵年去年來似有期

春秋長落幾人思天涯共道初來懼夢裏空驚夜雨時
海濱老禪得幽趣禪居正近潮來處山空水落境無人
地迴天高歲云暮塵緣斷絕雙耳清天機自動非人聲
上方鐘梵隨風散下界樓臺孤月明風微月朗衆將定
將定猶聞心轉靜來非有為去無情留連世韻何須聽
見說空軒百事無音聲色相盡成虛禪家自有西來話
莫向中洲說六如

松竹梅圖

西風吹滿空山雪草木摧殘衆芳歇方春三月二月時
錦片韶華逐飛葉歲寒心契百年期凌雲老幹凝煙枝
蕭條牆角半枯樹何事忽見瓊瑤姿寒香晚色迷幽綠
半入前溪半蒨屋翠禽啼夢蟄龍驚白鶴叫霜儀鳳宿
秦封晉逸兩悠悠人在西湖已倦遊炎涼不改固窮節
老大真成時輩羞炎涼老大隨時至畢竟誰非與誰是
惟有從來鐵石心風煙雪月都相似紅塵滿道踏歌聲
誰向窮荒訪舊盟隴頭不寄平安報湘曲應孤驛使行

明堂近復來梁棟篠簜琅玕盡登用却疑羌笛妬人來
一曲關山又三弄

夏仲昭萬竹圖為師知縣題

崑山老叟仙中人清和灑落無纖塵平生富貴不足道
筆挽造化回陽春坡真可妙真堪惜老息森嚴露形迹
鷗波亭外寂無人九龍山氣凌秋碧山氣凌秋勢薄天
凝雲挾霧快騰騫巉岩峭壁幾千仞此老直欲窮其巔
金閨瑣闥瀛洲路宣德年來誇獨步名高價重不復疑

世間托筆應無數枝幹依稀叢葉同天機妙解卻難工
就中一片飛白石爛然琢玉寒玲瓏塞予最好瀟湘景
見畫令人發深省曲處疑聞爽籟生深中似覺陰風冷
深曲低昂路鬱紆幽情欲盡似還餘三湘逐客歸來未
二女遊魂今在無從來能事不受迫醉裏蘭亭難再得
使君此幅自何來萬金寶劍連城壁半牕疎影對愁眠
斑管春寒詩思牽玉蟬吟吸鷓鴣雨文綃細簇玻璃煙
却思京國頻相見自謂相求當不厭豈料公歸綠野堂

至今誤我鵝溪絹江南菜竹漫成林山縣鳴琴白晝陰
他日使君江北去披圖應憶歲寒心

為李典史題畫

古饒山水稱浮梁地靈人傑多才良君家兄弟晚挺出
總是碧海青琳琅石田荒疎茆屋小夜讀朝耕共探討
半壁殘燈雨榻秋一犁破土煙村曉慈孝相承上下宜
鳴鷄乳犬亦熙熙一家伯仲自師友九奏琴瑟諧頃簾
難兄蚤作青雲客枳棘鸞凰應暫息難弟三登舉子場

至今猶斂冲霄翼斂翼冲霄會有期
鵲原一誦一興思
吳雲楚月路千里併入彭城風雨時
天涯會合由來少
感慨悲歌空復老
推牛屠狗事區區
燕趙何能豁懷抱
離別相將會合疎
故園三徑未應蕪
憑誰遠汲淮淝水
為寫安豐董氏圖

士女圖為張宗大題二首

吳城士女越樣粧
籠冠盤髻銷金裳
東風淡蕩桃李月
看花不語情何長
女伴相將牽稚子
庭院無人花正芳

春陽宛宛白日暮空抱花枝歸洞房

芙蓉迎秋木樨蚤開到黃花秋欲老涉江人遠鴈來遲
零落東籬為誰好小娃扶幼步車輕聞語回頭心懊惱
曲房深閉綠苔生何處寒衣月中搗

松石流泉圖

徂徠山人十八公石丈夜墮仙人峯淋漓元氣收不起
地脉似與天河通萬牛力盡神鞭斷海水茫茫平欲漫
不如流落此山中地老天荒共相伴

再遊吳興有懷岳文機太守翁載道大尹

東風蕩入層崖裏溪上新添半篙水
蘼蕪暖綠初齊揚柳眠寒柔未起
粉牆紅杏啟雕甍逢人誤問漚波亭
道場山下蘇灣路斜陽映醉登西陵
舊遊不忘年華改桃李無情春十載
詩社壺觴不再同醉翁琴鶴今何在
桑梓年年發故丘老懷多病念并州
暮雲望斷河陽樹舊雨獨上元龍樓
十年往事今如此此後重來復何似
惟有溪山對客閒鳥啼花落將幽思

張復陽山水圖為李信題

南山道人天發機平生墨妙探幽微胸中山水自許大
千仞復振岡頭衣筆鋒未下見丘壑欲挽闕荆驅李郭
一種荒閒寂寞鄉蒼茫鬱煙霏落日斷寒濤不盡山
寥寥宇宙一人間夕陽欲送晚色至寒意暗逐秋潮還
秦宮漢殿知何有玉帳牙檣今在否前人已往後人哀
忙地何如閒地久孤雲起盡水窮津潭影山光相照貧
超然坐到無言處風雨不動天長春道人此意無人識

一幅生綃露遺跡惟有風流李謫仙
汪洋宦海閒鷗立
夏圭風雨圖

長風吹折巔崖樹江色愁陰雨聲暮
蒼茫野艇晚驚潮
交揖橫篙無住處何人倚岸汎虛舟
風雨不動如安流
酒酣袒側蓬牕底忽憶瞿塘五月秋

題秋江遠棹圖

澄波練淨天同色萬仞蒼山垂絕壁
丹楓白榆相映寒
一片秋光九江碧溶溶漾漾何時休
寥寥漠漠湘潭遊

夕陽欲落未落處都是人生離別愁杜陵老病孤舟遠
瘦影臨江衣帶緩時平結伴好還鄉野渡無人天又晚
乘桴擊楫事堪嗟錦纜牙檣不到家天風去順來還便
高興還須八月槎

紀事

成化壬辰秋七月海濤騰風石塘決桑田夜變陸成川
一望邊沙煙火絕青苗白屋隨奔流紅顏皓首屍橫丘
一身雖存六親盡至今亂骨無人收已午年來歲云愈

乙未嚴寒冰雪沍無端申酉魃為殃兩度風濤迅如許
河流作溷蝸蚌生鹹風著樹枝條零苗方秀實水將涸
豐稔不及荒年登今年夏月久不雨清晝耘苗夜車水
可憐枵腹不支勞近海膏腴半枯死虹蜺目斷心焦勞
炎風吹雲天宇高誰知颶母肆狂虐平地掇入錢塘潮
溪騰谷沸雨川迸城壞堤摧風轉盛大家浥漏小家漂
不顧田疇顧身命因思去歲初陽逢雷轟電掣當嚴冬
如何六月忘溽暑一雷不振翻為風崇朝極夜力不息

潛啟蓬牕看天色東方欲白西未明可是龍王聽河伯
莫黑匪烏赤者孤有子死父妻死夫下車泣罪知何意
卿尹當思日月圖

為張都閫宗大題畫四首

東風凝寒抑絲軟細草新簾綠猶淺去歲光陰看又來
桃花紅勝前人臉前人已老桃花開茆茨布褐行相俛
琴書滿座溪山在花落閒庭生綠苔

綠槐夾道熏風起廬阜東南雲晝晦雷轟雨泣鬼神驚

一瀉奔流幾千里五雲山下六月寒九曲灘頭清海翻
只應三峽橋邊暮長有詩人坐石關

斜陽淡淡澄江晚渚蓼江蘋映葭莢蓬牕風颺釣絲輕
竹爐茗熟茶煙淡沙平浦遠鴈行孤人在瀟湘八景圖
平生自得江湖趣不是煙波舊釣徒

藍關路斷無行迹懸弧城深夜如日當年辛苦近何如
為探梅花問消息月香水影詩未成折花且讓枝頭橫
不知白鶴歸來未開却柴扉待月明

赤壁圖

江空露白殘煙收水光月影搖清秋風流賓主東南美
一舸夜汎鴻濛洲酒酣欲叩馮夷宅俯仰江山小今昔
興闕孤鶴過蓬牕不覺東方又生白

秋意

煙霏霧淡西風曉水淨山空秋意蚤江南雲物歲行周
空谷佳人念將老山行有虎川蛟螭登高目送孤鴻飛
田園不改桑榆盛見說陶潛蚤已歸

渥洼馬歌

何物偃强暴厲長權奇倣儻生歌章蒲梢西極杳相舉
天閑十二皆龍驤羌胡喜蹴驂騶步貳師成功宛初破
邊塞年年戰骨新錦轡雕鞍只如故

送劉廷信兄歸閩

時秋七月涼風度有客鵲原問歸路富春山下雲欲開
錢塘江頭潮未大潮落潮生自往還南來北去幾人閒
悠悠名利總如此誰解盤迴兄弟間君家伯仲稱聯壁

古色深沉氣溫栗五千文字老書生十二山川大方伯
廊廟江湖事偶然悲歡離合各懸懸萋迷春草池塘夢
落寞對牀風雨眠去年曾托南飛鴈有約今春定相見
看窮紙上萬金書不及燈前半時面晝語連宵向夕晨
青濃翻憶故園春平生本抱丘壑志長袖怕沾車馬塵
到家時節應重九丹荔黃柑菊花酒隣翁野老笑相迎
又是浮生一開口鴻鵠冲霄奮羽翰從今不苦鵲鴒難
會須培植堂前樹待弟歸同白首歡

和丘伍二同年賡唱詩

丘仲深伍公矩元是長安看花侶三百人中十數人當
時知己聊如許仲深南海舊文英千仞岡頭丹鳳鳴五
經腹笥劉原父三峽詞源蘇長卿可與言人百無二磨
鈍剗煩公矩事清商卻對痼聾彈利器翻從頑石試蹇
予同醉杏園春東抹西塗白髮新十年諫苑陽城晚半
載滁州永叔貧國子先生六堂表冠佩還家塞翁好青

用未必精邪良士無賢愚無所遇榮枯得失當相忘江
東雲渭北樹仲深不來公矩去西風晚急茂林空望斷
斜陽舊遊處

左時翊雲山煙水圖

懸巖絕壑峯巒古碧梓丹楓隔幽浦蓬戶晨開薜荔煙
漁舟夜泊蘆花雨暮去朝來水石間寥寥塵境幾人閒
斜陽又度桑榆影風露欲經蒲柳顏峴山盤谷人歸久
故宅殘碑今在否牢落功名紙上書消除光景杯中酒

古往今來事共然山川遊覽自年年
還應剩取春風興
留賞黃花晚節天

夏圭松濤怪石圖

巨靈鑿山翻地軸老龍槎牙奮空谷
茫洋瀨氣溢不收
一道奔騰鬼神哭
呂梁洪上孤月明
徂徠黛色參天橫
黃河一瀉幾千里
人道天潢東向傾

青陽使者膚如鐵
玄冥老翁頭似雪
雲根丈人勢敵虎

仰天俯地望不極卻憶西遊瀝瀝堆

瀑布圖

綠陰庭宇生南風醉倚曲闌幽思濃平生不到水簾洞
一坐便憶香爐峯怪來詩思清人骨水草林花助蕭颯
煙霞滿地暮忘歸長嘯一聲山月白

王若水石榴枇杷圖

涼風蕭颯紅錦裳翠袍漸染臙脂香琅玕枝重壓欲折
青女欲拆珍珠囊金鋼碾碎鴉鵲石絳綃迸出玲瓏色

葡萄酒盡蔗漿空一顆靈丹透詩骨

東州奇花凌早寒吳山月廊夜半酣何人誤作上林賦
病骨却思黃蠟九同時不數楊家果三寸吳湘空萬顆
會須載酒醉西園一樹黃金壓枝墮

並笛圖

被裏鴛鴦春睡足蛾眉補尖凝黛綠沉香亭下鹿眠花
倦倚東皇吹紫玉翠鬟暉香薰拓黃左拍酥肩右按腔
宮娃張板候節下花奴緩舞隨聲揚流宮變羽都在口

縱橫半借君王手就中一指忽差移風驚別調淒涼久
蜀江煙水接華清並轡何如竝笛情可憐一曲昇平調
弄作鸞鈴哀怨聲

為張僉憲題畫松

九疑山中十八公元氣結聚非人工精求本許周廟致
偶遇不受秦人封寒來暑往年華暮酷月蒸林雪圍布
柔芳弱蔓幾枯榮老幹槎牙只如故東風吹和春雨零
萋迷碧草連根青野獺林鶴相對晚時有山人尋茯苓

東閣同心美如玉音信寥寥渭如澳金粉香飄花上黃
虬鬚紫簇枝間綠採花釀酒枝插頭仰援紫藟俯碧流
盤根錯節終不試猶勝野斷橫中溝枝頭滿酒盈甌為
君起舞岡陵頌造化生材會有期莫入丁生醉時夢

尹編修家山圖

泰和城外雲亭鄉蓬原書屋遙相望東園別墅圖書靜
恩慶高堂雨露香堂中才子金閨客身在雲霄志岩澤
一路寒山萬木秋滿林風雨孤琴夕閒來杖策躡龍巖

絕壁飛來紫翠涵
筆架峯前尋藥草
城頭嶺上望秋潭
日斜回首先公墓
雙鳳迴巒擁高樹
童子曾聞鶴弔年
居人尚識牛眠處
紅塵滿路世悠悠
得失榮枯共白頭
清風明月不須買
寶馬朱輪空自憂
君不見平泉莊上
生禾黍
金谷園中絕歌舞
盤谷愚溪直等閒
留得詩文照今古
三徑黃花手自栽
年年秋雨一番開
功成身退應何日
預報雲山歸去來

送荏平王秀才

憶昔春闈赴京邸落日停車馬周里風塵客路一相逢
空谷足音殊可喜下第南歸各一天重來又是六經年
君家兄弟情如舊呼酒張燈開夜筵明朝再唱陽關曲
屈指韶華今十六瑣闥追思日似年碧雲悵望人如玉
渭北江東白鴈疎屋梁殘月暮牕虛天涯消息有時有
夢裏神交無處無對牀風雨今何夕一見令人動顏色
但覺情懷只舊時不知歲月非前日盍簪未已又言歸
椿樹凝霜鴈影微陽和乍入官橋柳寒氣偏多游子衣

難兄已荷軒裳貴嗟爾年來尚衿佩秋風八月桂花時
準擬都門重相會

癸卯寓杭戲寫目送飛鴻手揮五絃圖潦草為婢
子所笑因題與女玉祥收為劉氏清話

九月十五住杭州瀟瀟風雨生離愁閒尋敗筆作圖畫
生紙爛墨傷昏眸小鬟立侍笑欲倒走入幽閨向娘道
山頭頽似土灰堆樹根亂若蓬蒿草空中四鳥飛橫斜
筆濃大如赤老鴉烏紗素服一閒客坐看去烏彈琵琶

我生不是丹青者適興投情恣揮寫等閒塗抹豈足言
便有旁觀說高下何況嵇康妙絕倫清談曠視能容身

胡廷暉院景

遊絲落紅春賞罷金屋瓊樓敞如畫乳燕雙鳴午夢醒
曲闌半露薔薇架太液池頭花正開水香清逐南薰來
冰山雪艦無人到共聽朱絃歌阜財

魏仲禮金筆院景四首

瓊芳玉爛春如畫金屋娉婷晚粧罷紫垣星象照千門

天上人間共清夜金蓮炬促雙步搖銅龍咽盡蠅聲囀
衾裯未暖聞魚鑰起候宮車視早朝

衆愚玉館未垂絡水殿玲瓏澄碧落綵扇翻香蛺蝶輕
綃衣簇翅蜻蜓薄釣天畫永無纖埃水晶簾動南薰來
三千粉黛放將盡十二樓臺閒自開

畫屏銀燭秋光淡寶篆金爐香夜旦昭陽前殿月華沉
長信宮中漏聲斷晨辭同輦別椒房紈扇涼多未忍藏
梧桐露重桂風急吹作芙蓉葉上霜

甌能視滿貂闌密月光斜透墁香壁入爐內障曠前聞
耐酒鼎羹荷殊錫內間時報五更籌一點銀燈過御溝
邊衣連夜催刀尺明發傳呼焚雉裘

題劉士元驄馬行春詩卷

驄馬來行自燕摧奇倣儻步驟妍初辭仗御下天閑橫
絕四極周三邊萬騎卻走孤雲騫朝馳薊門道暮刷吳
山巔茁藿塞場水溢川金鞍寶凳白玉鞭生不為秣飲
美節馬足憐方瞳流光徹幽玄驥尾拂掠開風煙仰天

一長鳴萬籟寂不喧形聲氣態衆殊調勞逸動息時相
緣乘艱履險意閒緩足跡所至對狼跼山川草木忽變
色幽谷似覺陽春旋角端樂生豸惡奸鳳至圖出人文
宣神物自與元化會匹力上佐龍行天未可按索驪黃
間驄馬還行至燕

朱彥明母慈節詩

妾年二十餘誰信終孀長獨居妾子方乳哺急水浮漚
豈能固妾甘凍餒兒長成冰壺玉潔堦蘭榮兒能讀書

妾終老良人瞑目黃泉道

為翁載道同年題望雲圖

雲飛處瀟之潯朝朝暮暮生幽陰天高地迥望不極長
風落日愁人心憶昔童稚年慈顏蚤相背萱花再發椿
株榮白首青氈望兒貴兒今已貴雙親存蕭條菽水違
晨昏吳中煙水空回首三峽哀猿啼斷魂君門萬里從
來語翻笑庭闈今復爾悠悠忠孝兩遲回卻望孤雲淚
如雨躊躇未已雲飄揚欲飛無翼川無梁兒心願作西

郊雨萬里隨雲下故鄉

王孟端竹

九龍山人王孟端風流博雅人稱難漫胸錦繡消不得
化作萬箇青琅玕中山兔老鮫綃白馬肝香透金壺汁
風迴赤壁浪痕平雲黯蒼梧雨聲急鐵鉤鎖金錯刀邯
鄲學步真兒曹大河一決瀉千里崩崖觸處生驚濤世
人豈識真和假白雪詞高和應寡坡仙儋耳未還家落
日臨風思老可

賀李用經得子效拓梁體

古燕豪傑中朝儒列卿柱史人間無廷平執法及乘輿
泗州推官夜治書儲祥積慶久不渝來休下瑞相昭符
長庚孕秀騰天衢嵩嶽降神鍾地區熊羆入夢九鶴趨
五老列曜紛前敷龍葱佳氣藹門閭一片清冰出玉壺
初傳丹山五色雛又訝魯國連城璵無乃合浦千金珠
英氣熒熒聲呱呱目光流電雪作膚頭角峙玉雲擁顱
伏犀入頂四輔俱罹計挿鬢秀且疎金木聳貼潤復紆

天庭高廣顧地樞孤峯立筆雙井腴一水環仰中溝虛
神采氣骨畫不如斷蓬為矢桑為弧九州四海當長驅
英物自與常人殊吾聞宗元謫番禺反顧無嗣悲窮居
又聞康節四十餘得子尚慮賢與愚君今早應梁棟輸
眼底復見圭章儲前程莫問榮與枯萬事已足將何須
便應列宴開行厨烹龍庖鳳傳笙竽起舞蹴踏紅氍毹
酒酣擊碎青珊瑚與君舊是瀛洲徒春風玉殿同傳臚
浮雲流水南北途故鄉遇舊增懽娛喜來忘卻爾汝呼

落筆故使璋獐誣聽聲知貴名當余湯餅上座事屬渠
他年歸來駟馬車記取堂下三槐株

松磳秋聲圖為壻劉希仁題

嵩高山下秋風起萬壑蕭颼碧雲裏黃河之水天上來
一瀉崑崙幾千里竹爐茗熟驚濤生春蠶食葉綠車聲
風迴忽若九韶舞簫鼓琴瑟相和鳴茫茫古意翻新調
里耳皇芻嗑然笑天地從來有正聲伶倫老去誰堪道

為劉廷器題松竹二圖

荒煙滿地凝稠綠一片秋聲振浮玉蒼梧雲重泣湘靈
翠袖天寒倚空谷西林三徑閉松闕江潭遊子何時還
鳳凰來儀九功叙伶倫老去鄒生閒

嚴霜作釁百草黃春紅秋綠紛成荒窮陰不變太古色
老節直與層霄昂徂來天高岱宗遠萬牛不見空山晚
造化生材自有宜行人落日生悽惋

題林良枯木喜鵲圖

金門畫史番禺仙意與物化搜冥玄風流妙得寫生趣

落筆便可追黃筌
陟里素薄玄霜隰
海枯網爛珊瑚黑
風煙滿樹忽飛來
野色蒼茫向人立
運斤遊刃紛馳驅
橫斜順逆皆乘除
平生阿堵最難處
毛羽不理精神餘
浮丘道士憐奇貨
素壁高懸三日卧
解令化石恐還生
莫學張家便推破

遊春圖

請君停鞭駐君騎
一曲春歌勸君醉
去年今日看花時
人面桃花在何處
柳橋花塢春光深
村娃喚酒娛春心

明朝再向村中過滿地落花芳樹陰

一徑野花落孤舟春水生畫

林外春陰曉風作門徑幽深野花落東家春色過西家
井口籬根亂漂泊溪頭新水繞門生扁舟一葉輕如萍
杜陵老病煙波遠欲載詩愁過洞庭

送莊瑩中吳謠三絕

見說仙郎賦遠遊嘉興西北是蘇州鴛鴦湖上春來水
別思相隨到處流

禾稼青時省我耕
禾稼黃時君遠行
收禾輸官剝作酒
壺漿三月候行旌

君是江湖天上來
儂如漁艇赴潮開
潮若去時儂便苦
朝朝日日望潮回

題平湖陸廷儀鵠原耕隱詩卷

甌窶滿湖南
汙耶滿湖北
湖邊隱者眷同心
却向湖頭結書屋
屋中經訓乃舊畬
釋耕互答鵠原詩
三監不仁萬世戒
而我與爾何當知
稻黍登場先饋祀
大小輸官

入城市城市無人識姓名歸向高堂賀安止堂中老人
太古風鏐鏐更似田家翁貽謀燕翼苦不遠尚願孫輩
起羣庸老人摩挲抱孫說長大還守湖田業勉學而翁
與若翁兄弟不分耕不輟

賦得懷姑蘇送人歸長洲

懷姑蘇隔千里風景繁華似流水去年雨水溢田疇野
草不生禾盡死黃童白髮擁道周朱顏綠鬢無人收閭
閻門外夜深處饑魂餓魄聲啾啾城中大家稱萬石坐

食人多徵借急新廩生塵舊廩空縱有黃金何處糶市
塵羅綺賤如泥吳蠶薄熟難為絲公家租賦雖停止官
府征徭仍舊時長安貴人遊俠客騎馬行行過阡陌回
頭笑指虎丘山却道繁華猶似昔九重天子念窮廬太
守新乘使者車巡治勅分都御史平衡全任老尚書君
歸為我詢同里故宅多應換新主隱山橋下水茫茫去
任舍冤死生苦

郡太守齊公歿既為近律以悼司勳沈先生少予

言作薤歌

薤上露何瀼瀼古人去後今人傷北邙山頭日無光悲
風蕭蕭生白楊金玉充前除一去不得將專城五馬貴
穹碑映斜陽惟餘父母心黎庶增淒涼長淮水流雲路
長薤上露何瀼瀼

送劉指揮邦彥襲職南還

將軍少年才且武二十辭家見明主自陳功伐拜天顏
帶礪山河自先祖祖死轅門父守邊風沙凌厲雪盈顛

據鞍不復清時用撫劍徒懷旅力愆繇來勲業期無替
韜畧傳家世相繼聖主方思禦侮材兵曹共識干城器
天書薄暮出黃門平旦尋承世襲恩金帶鏤花明曉日
錦衣盤獸結春雲明朝便踏南歸路馬首青山天外樹
鴻鵠冲霄闊塞長雲霞出海江天曙君歸為我問邊隅
倭夷伺間今何如晨操夜守五千卒披堅執銳寒無廬
吮癰死士古來有況復青春讀書久不見江南幹事人
弈葉登壇傳不朽

題畫

天空水濶饒風露
秋入溪山無盡處
紅葉低垂隔浦霜
白鷗飛落無人渡
蕩漾空明一釣舟
煙蓑雨笠下中流
心情物色知多少
手展青編還自收

葡萄圖

紫蘇步幃流蘇短
露淡風清秋未滿
舞鳳翎翻翠解苞
蟠龍骨瘦殊垂頷
青葱苒苒錦石榴
枝交蔓引彌山丘
驂騑不至仙槎遠
空有卉物遺中洲
君不思涼州一斗

猶輕換西行千騎歸無半

方洲集卷五

欽定四庫全書

方洲集卷六

明 張寧 撰

七言古詩

柳塘為吳江題

東風吹林楊柳長依依
裊裊迷橫塘密葉藏春鶯語早
飛花撲地燕銜忙
塘中水添時雨足
颺綠浮青近華屋
屋底閒人醉出遊
桂棹蘭橈泛深曲
坐聽林外桔槔聲

行近漁舟和濯纓青藜杖緩簷陰合白苧衣涼潭氣清
荒閒境物堪長保鴻雪鴉煙情未了不及西湖十里香
猶勝蕪城兩堤草

自寫松泉圖題以寄意

若欲窮黃河源星槎虎符行路難若欲登蓬萊山列仙
真宰當玄關勁風弱水不堪即飄如落葉辭柯還故鄉
迢迢滄海曲十里青山一茆屋山下泉聲日夜聞山頭
樹色陰晴綠樹色泉聲春復秋歸雲過月共悠悠乾坤

遺我古來物世間萬事皆浮漚閒時倚望終晨夕轉眼
光陰真頃刻勞逸悲歡各自迷千古浮生如一日如一
日無窮期醉人已醉醒人知涼風瀟瀟吹鬢絲松煙竹
露含清滋高山流水從前意綠綺無弦彈向誰

層巒秋霽為諸立夫題

秋風吹雲秋雨晴羣山滌翠羣峯明天光下際澤氣隱
一碧萬仞青螺橫山高石峻無蘼草桂館蘭房淨如掃
振谷天球練瀑飛障林霜錦丹楓繞采蘋誰汎小蘭舟

急水迴塘不自由雲端笙鶴來何晚澗底荆薪人白頭

題劉公瑞松琴卷

君不聞沉香亭前鳴羯鼓翻厭絳桐汚人耳新聲媚質
兩浮靡世好難憑每如此屏山隱者愛幽尋山下青松
橫素琴紛紛紅紫久無色消盡人間金革音蒿萊滿地
迷煙雨一曲吳謳亂宮羽鍾期長往梓人亡日落天低
秋思苦

汪僉憲母孺人壽意圖

丹丘石室芙蓉峯金輝玉爛瑤華宮三千綽約風埃表
十二雕欄雲霧中地靈天保人時好元氣融熙人不老
嚙嗽玄和玉液泉茹餐沆瀣金光草南州阿母婉清妍
前身恐是宮中仙凝真不藉姮娥藥度世暫別崑崙天
爾來三萬六千日海屋籌盈纔九十富貴元無薄命人
神仙自有長生骨畫堂六月南風涼水晶簾捲龍涎香
蘭孫桂子煥人瑞鳳冠鸞誥回天章何人索隱鉤玄藏
方丈瀛洲忽相傍靈貺無聲入畫圖壽徵有象開屏障

南岳夫人宿駕還麻姑東海未離山惟應西母雲輶近
自捧蟠桃薦白環

畫蘭為李載章大尹賦

君不見春風二月三月天桃紅李白紛妖妍清歌妙舞
歡未了落英滿地生愁煙又不見天南海北荒村道極
目萋迷總芳草牽愁引恨不知名可惜流年為情老人
生光景何匆忙歡娛易過哀思長楚鄉舊憶今無恙湘
江水碧湘山蒼晴日宜晴雨宜雨幽谷年年悄無侶榮

枯喜樂兩超然老去心期只如許歲月悠悠忽復殘微
霜欲度曉風寒依懷共結同心約淡薄誰將冷眼看百
畝幽芳連九畹佳人一去何時返舊遊衣珮向誰還白
石野簞孤月晚草色逢春處處芳公門桃李滿康莊惟
應老謝庭前植卒歲長含雨露香

唐人鈎欄圖

君不聞天寶年中樂聲技歌舞排場逞新戲教坊門外
揭碑名錦繡鈎欄如鼎沸初看散末起家門衣袖郎當

骨格存咬文嚼字瀾翻舌勾引春風入座溫年少書生
果誰氏弄假成真太相似左呼右闌只自如博帶戎冠
竟誰是衆中突出淨老狂東塗西抹何狼獾解令笑者
變成哭直教閒處翻成忙粉頭行首臨後出眼角生嬌
眉弄色從前人物空自譁一顧廣場皆寂寞障中搥鼓
外擊鑼初來隊子後插科朱衣畫袴紛相劇文身俱面
森前儼拿生院本真足數觸劍吞刀并吐火千奇百巧
忽不前滿地挑花細腰舞酒家食店擁娼樓玉壺翠釜

蒸饅頭稠人廣座日卓午捧盞擎杯爭勸酬眼中不類
心中事嬉笑相同饑飽異可憐樂極易生愁回首斜陽
忽無處悲歡離合總虛空好惡妍媸變幻中世間萬事
皆如此何必鉤欄看畫工

題沈石田雲山圖

青山白雲無處無幽人寫作雲山圖山荒樹老雲不散
落日未沒春愁孤蘼蕪滿地王孫去鶯燕無聲春已暮
容谷佳人白髮新清明寒食傷心過

葡萄歌

君不見貳師城外行人稀葡萄滿目秋離離初年托根
古城下歲久漫與城垣齊城下居人日爭樹伐幹分根
不知數一葉寒聲動地秋盡入城中酒家去萬里征車
大宛回離宮別觀一時栽背背榴花爛相照知是將軍
西域來火雲亭亭天伏暑滿架繁陰涼似水屋裏蛟人
坐泣開海底蒼龍蟠不起春茲歲月幾悠悠捲蔓何人
入具丘雨露不忘中夏澤冰霜長保故園秋故園風景

今寧好名馬千金野田草惟有年年客土春至今猶說
漢朝人

陳啓陽風雨二竹圖

落紅滿地春將半細雨斜風玉零亂
槿籬蘿屋兩三枝
翠袖低垂白石爛太液池邊萬歲山上林幾許非人間
掖垣埤闥春陰裏記得題詩晚直間

春風淡蕩湘中林桃紅李白春光深林隅菜竹密如櫛
羅綺不到薜蘿侵羲和南馭西風蚤勁節青青老還好

君看舊日競春芳不及湘林路傍草

刑科錢士義陞山西參議臨行以流泉小幅求題

書此見意

洞門高閣春多雨鳳沼無塵漲新水九天空翠潤生香
一道微茫清徹底分流日夕響成雷白石蒼松飛浪催
餘波萬里沾枯槁始信黃河天上來

為張彥暉寫蘭竹題

懸崖照水生叢蘭杜若洲空修竹寒光風夜轉吹不落

國香倒拂青琅玕涉江遠道誰堪采晚節平安應未改
夢中猶自憶同心楚鄉風雨知何在

一笑山琴月盤倚醉石

迢迢鬱林州渺渺扶餘國截斷洞庭波蒼茫古顏色空
庭懸磬白日孤四無完壁生蘼蕪殘刊敗紐鍾鼎破稜
層斷骨蛟龍枯不堪元亮眠不下元章拜醉來半倚醒
半憑側對青山不相礙彈琴聲益清候月影先在空山
寂無人兀立如有待昔為誰家物今為吾所愛今來古

往復幾年問石不語心茫然失亦不足悲得亦不足憐
世間萬物皆暫有大夢未覺爭媼妍李文饒牛僧孺愛
物何同愛身異間關進退互不持縱有珍奇焉足計載
鼓紛亭操載歌謫仙詞青天湛湛知音少一曲秋風兩
鬢絲

文與可雪竹為劉揮使題

陰風吹雲時物換六花漫空大成片琅玕凍折鳳翻巢
素羽離披玉零亂淇隈晚霽天籟寂湘浦宵寒旅行斷

長川巨挺千畝荒曲水幽叢數竿短清如映誦老儒紳
勁如瘦馬藍闕人祇害天荒節猶立鵝池路險戈前陳
一寒范叔故如此半死袁生未是貧事當憂患見君子
時到否塞回陽春虔心苦節終無改毅色英標暫如晦
九成合樂笙簧齊四海同文簡書在進登廊廟更華顯
退處山林亦瀟灑不遇淒涼冷落時寧知遠大堅貞態
湖州太守時宗工奎光斗氣交龍蔥文章不減中古士
畫法稍過東坡翁高堂素壁三日卧毛骨彷彿臨嚴冬

金史口居
卷六
晴雲秋月塵埃斷鑒定還須問潞公

為吳汝輝題杏花鷄

枝上杏花紅盡吐枝下鳴鷄日當午千花萬花錦作堆
大鷄小鷄鴈成侶落英點羽浮霞輕華風不動香塵生
羣雛狎母競啄逐孤雄竦眊緣花行東君為恐春歸蚤
暗促晨聲報春曉狂蜂浪蝶卻不來惜花又怕春情擾牝牡
埒樓健息滋栽培秀實趨芳時伏烹奮門耽花老却笑
長安遊俠兒

吳汝輝任月山公子醉歸圖

清秋灝氣連山區貴遊子弟行相娛崇光豔色凌丘隅
景物似與尋常殊文魚泳躍珍禽呼金池瓊島周模糊
老樹眩若紅珊瑚被服綺麗雲霞敷冠履美好玉帶紆
雕鞍寶馬交通衢青黃赤白紫駁盧驥騄駼駮駮駮駮
矯如遊龍捷飛狐一一盡是千金駒上騎五色餘僕夫
窄襟短後纓曼胡絃幘隘袖襟裊襦錦囊繡襪垂流蘇
武儀文具步技俱負乘總是蒼頭奴想當初筵列行廚

新豐美酒千斛沽興來一飲三百壺出門初旭歸及晡
去已矜肆歸豪麤一人醉俛先羣徂一人卻顧迴頭顧
一人偃促思長驅一人酣樓如曲瓠中有甚者雙夾扶
垂首鞠背同擒俘行從輻集高陽徒瓶傾罍罄恣餽鋪
叫呶突兀口囁嚅蹙立睥睨行連踵攀鞍捋臂掀長鬚
前不辟人後不趨溷褻不異鷄與鳧月山老手寫此圖
無乃作鑒昭蒙愚詩書明訓慎勿孤一日酒喪終身污
君不見嘉賓式燕醉若拘五陵遊蕩無時無

趙千里赤壁圖

大江東去飛濤急故壘西邊壁垂赤玉堂學士天上人
兩度隨攜漫遊客放歌一曲下中流洞簫倚和言更訓
清風明月不須買欲與元化相周游酒酣袒卧蓬牕窄
不覺東方已生白再來又是孟冬時過眼江山忽殊色
披荒履險登崔嵬劃然長嘯山應頽迴舟蕩入鴻濛裏
時有孤鶴橫江來平生到處多佳遇海市登舟亦奇事
文章變態發雕龍意象飄飄夢中是鐵騎長駟欲閉關

前珠後壁煥爛斑伯駒圖畫鮮于字二賦長流天地間
巢松幽人呂山下收藏不惜千金價清秋明月畫樓開
應有虹光徹長夜

題山水畫

東風雨足春芳早天鷄一聲春已曉陽烏飛立扶桑顛
紫氣虹光繞雲表南山煥聳青巒北山突兀蒼龍盤
飛泉出峽山欲動眼前似覺天河翻松山檜栢連崖嶂
樓閣亭臺迷遠望行居坐作總優閒斷隔紅塵幾千丈

松飄晴雪落鷗沙想像吳興學士家墨妙亭中調舞鶴
碧瀾堂外泊浮槎抱琴有客穿花塢吠犬鳴鷄日將午
主人聞客未褰裳童子迎賓倏開戶白雪陽春曲暫停
好乘清興共高登蓬萊方丈知何處羨門安期焉可憑
江山風月應長在山下遊人歲更改已見朱顏換白頭
未會桑田變滄海古往今來事共然榮枯開落事相緣
不如徧歷佳山水日日相攜上酒船

漁村圖

荒山野水通漁浦
浦山漁家隔芳嶼
放棹晨炊北渚煙
聯蓬夜宿西巖雨
停罾晒網收鷗鷺
彷彿瀟湘日暮時
不知何處乘桴伴
猶唱三洲估客詞

看桃圖

枝上花花下人紅
芳與綠鬢顏色驕
青春花開滿枝還
結子人生莫作浪
遊身

和張汝弼贈黃時英韻

垂楊茂草西湖路
有客攜詩笑相顧
平生解作子長遊

一舉能輕季倫富三江風月五陵花軟紅香土迷繁華
當時壯觀老猶在欲凌倒景餐晨霞

三月十四日堦劉希仁遨遊馮氏湖亭風雨夜作
已刻始霽冒濕而前卒成勝賞呈同遊諸公

湖山夜雨催春急鶯燕無聲曙猶滴東風似是惜春歸
淡掃陰雲漏初日從來晴好雨亦奇雨晴晝至添華滋
人間盛事常不滿逢歡便作快心時

金蘭竹石圖為王廷光僉憲題

瑤礎玉杵鏐霏皎鳳膏膩滑狸毫繞都將麗水岸頭沙
灑作湘臯畹中草靈均珮重絡索乾湘妃菊衣秋染單
琅玕鬱密錯刀碎鸞翎旖旎商飈寒君不聞同心之利
堅可斷請看南山黃石爛

林良九鷺圖

番禺畫史何好奇以鷺作路思作鷺孤為一世功名路
九擬魯論君子思古來工藝皆有諫此畫於人亦深鑒
翔集低昂斂鳴縮舒近時臨容止變舉者忽下去忽歸

半窺魚躍半防機，藏形不向青邊立。
蔽影多從白處飛。
寒塘淺水黃蘆葉，暫寓旋消鴻踏雪。
人物雖殊戒慮同，
座右箴銘為誰揭。

戴文進山水為王君載題

朝陽出海東方明，巖西宿靄和煙橫。
林空花落春欲暮，時有戴勝桑間鳴。
小舟一葉行還艤，載得圖書滿蓬底。
山光水色不勝情，未轉崖陰似千里。
西湖歌舞日悠悠，錦纜牙檣總貴遊。
安得荒閒如此地，與君同泛米家舟。

謝抗醫夏時彥

錢塘名醫夏克和我曾倒屣邀經過當時橘井深幾許
至今孫子揚餘波烏金素服黃絲帶金匱青囊早油蓋
肩輿朝出暮歸來常有鄉人候門待友竹高人王瑞之
秋來遺我雙魚書書言女弟膺劇疾病纏弱女眠將徂
世芳太守憐弟婦倉皇共訪回生手感君匕劑起沈痾
五月春陽轉枯朽白頭有妹復有甥太守兄弟家和平
伊誰大惠忽致此何以上報瓊瑤瑛煩君為謝殷勤意

新章早托鱗鴻寄贈金自古不如言交義由來迥忘利
老我方洲筆硯荒愧無佳句為傳揚惟應子益遺書在
不用當時玉局方

捕魚圖

商船竟夕發蓮棹懷晨遊勞歡兩難久不及漁家舟三
江風月五湖景婦子相隨到白頭

江天欲雨圖為陰僉憲題

大山昏冥小山黑萬樹迷林江變色老龍吸波倦出海

少女驅雲未行急
白日晝隱西郊陰
欲雨不雨愁人心
傳巖有客晏猶卧
莫待旱極方為霖

畫石谷圖送吳提學陞雲南憲使

石谷山頭雲晝開
石谷山下泉縈迴
谷中主人欲高卧
霹靂一聲驚夢回
六經膏澤已漸被
四方霖雨遲滋培
大川舟楫小如葦
惟有圖籍江南來

五言律詩

北行別友

去去青雲路何時更盡簪西風遊子恨落日故人心報
國憑三策論交薄萬金寥寥塵境外詩酒卧東林

送黃掌教

泮水官初滿臨岐意黯然風雲千里道雨露九重天碩
學推程顥清才數鄭虔願言行莫緩臺閣正求賢

張世清愛竹軒

辭官歸故里種竹已成林掃葉容春笋編籬護晚陰清
風如有意明月本無心幾度臨軒坐煙消綵鳳吟

寄劉珙弟兄

不見諸賢久空懸
每日思大兄
膺就業叔子盡能詩
歲月嗟長往功名未有期
自憐遊泮水空憶少年時

領舉別武林主人

別業幽棲處攀緣及上方
地深松葉暗天近桂花香
館客逢華薦居人饋玉觴
青雲從此去回首意難忘

題閒居詩卷

一屋吾所受三徑舊嘗游
自有閒中樂其如物外求
煙

霞居散地人事付虛舟見說軒中客而今好白頭

綠陰清晝堂

山中有高士結屋住巖丘樹密烏聲亂林深鶴夢幽雲
來疑向夕風度欲驚秋何日尋三徑相期避暑遊

送安二兼簡令兄仁遠

故人不可見令弟早相知文采京華自威儀伯仲推雲
深江樹黑天遠鴈書遲若問同袍者悲涼比舊時

寄崔惟正

瘴海風煙息江關別意長思親愁未了憂國意難忘一
將城東壁孤軍歷異鄉功名當此際慎莫厭風霜

齊壽為沈秋官作

世治憂虞外身閒疾病稀秋風雙白鬢春雨兩斑衣結
髮恩長滿齊眉願不違同年復同老鸞鳳竟于飛

寄劉世經

一別隔千里天涯日日心草深蘭畹路雲滿薜蘿陰往
事翻成夢孤懷只自吟相思不相見情到忽沾襟

送王給事使滿刺加

聖主重遐荒天書命夕郎樓船浮瀚海冠服被蠻方島嶼三韓近風雲八表長茲遊未可倦重譯又來王

送人冠帶還吳中

自領公車召十年今始歸忽驚文采別未覺鬢毛非落日迷烏鳥春風動錦衣慈親正強健此樂願無違

送常州王經府

三年勞贊府千里觀長安政為傳家熟清因近俗難煙

雲江浦別風雨郡齋寒却愛難兄弟聲華總未閑

思親

記得高堂別俄驚信息稀夢隨青草極目斷白雲飛晚
色應催鬢新愁欲滿衣庭闈有難弟非是莫忘歸

題赤壁圖二首

孤棹臨江發中流晚色開相看今夜月曾照幾人來世
事更棋局浮生落酒杯扣舷清興發沉是洞簫催

吳魏忽已古江山遺至今年華互流易詩酒重登臨宦

達悲前事清遊契宿心無端孤鶴夢回首夜沉沉

和楊同府閒雲晚興

本是無心出歸來晚更閒風高防遠散雨小幸時還
淡薄秋林外寒停夕照間同行五色伴歲盡未還山

題劉曜卿畫

青山迴北里白水繞西隣世路悲寥落煙霞愛隱淪
柳邊垂釣者花下抱琴人不是懷長往明時蚤乞身

挽劉孟庸

衣冠歸舊族儒術自皇元落日迷滄海青山滿故園衰
麻悲令子暮杖哭遺孫海外諸朋友傷心入夢魂

題王子久畫

地域分吳越河山閱古今江空寒鴈下天遠戍城深
達悲長往睽違負此心何當隨釣叟歸卧北巖陰

題畫

綠水明遙浦清巒發曙光舟人迷蜀道估客望沅湘
近渚江籬熟盤雲曉鴈翔懸知登眺日懷古使心傷

菊樂

未發先期賞臨開不倦遊杜陵嗟有淚彭澤故多愁詩
化寒香淡情甘晚節優宜男空自好對此共忘憂

寄吳興前輩

懷人不可見名譽重相傳詩酒閒居樂箕裘令子賢鶯
聲節屋雨草色暮山煙惆悵天涯路吟成倍黯然

挽富太守

不識荊州面常聞寶老賢一官成白首三世共青氈夜

金匱要略卷六
月磻溪路春風杜曲田傷心懷往事草色自年年

送張璉下第還大興

共是天涯客那堪復送君感時悲賈誼下第惜鎬蒼
海漚波遠青山鳥道分聲華久自著聊復歎離羣

為姜用貞題梅

海宇年芳盡孤標晚更奇不緣風雪裡那見歲寒姿止
渴慚無補調羹已可期逢人如有便莫負隴頭思

挽人母亡

萱親不可見
令子竟何依
落日啼烏鳥
晨風動綵衣
傷心看隴樹
清夢引慈闈
為問王孫賈
誰應望汝歸

曹以安仙桂堂

華屋臨仙境
高標遠世塵
誰移天上種
為有月中人
香和金蘭遠
陰連玉樹新
于今堂下景
併入杏園春

送張璆二首

客裡相逢好
臨期益惘然
歸心吳苑月
鄉夢楚江煙
雲水經千里
星河共一天
重來應未卜
塵榻為誰懸

五月都門道長歌送遠歸北來青草歌南望白雲飛久
病慙余拙高懷似爾稀江湖舊遊事此別定多違

世德堂

不見高陽里華堂似太丘九州垂遠裔千載繼遺謀婚
冠酬嘉會登歌集勝遊猶疑羣從夜星象動高秋

登方洲一笑山

徙倚出前除登臨極夜初月高墻影盡風淡樹陰疎步
緩行堪久歌闌思有餘瀛洲在天上吾復愛吾廬

貧樂窩為王本正作

陋巷無餘地破廬常見天往來渾不覺老去欲忘年世
味閒中豁冥懷澹處便浮雲門境外詩酒只陶然

歲寒圖

松竹有晚質野梅寒共芳穠華看又歇疎冷故如常廟
用期同調居閒欲並藏相知自相久非是別炎涼

詠竹寄所知

地僻種元少年深生漸滋向無當路笋時有出林枝晚

翠遲堪並春紅近亦宜陰森聊自爾慙負雪霜知

哭劉緩齋

橫涕強吞聲愁懷百倍生一家摧柱石七縣失耆英零
落春秋筆虛徵月旦評惟應天上月清澈似君情

竹鶴老人畫為徐時用題

山水藹清妍吳東三月天雨中聞社鼓樹裡見炊煙詩
景誰家屋閒情野渡船無人共登泛斜日下長川

雪中偶興

晴雪萬山深蒼茫曉尚陰泉聲來絕澗寒氣積疎林盡
道豐年死誰同卒歲心灞橋驢背客詩思正相尋

為楊廷獻題畫六首

山色青無際溪流綠漸深淡煙依遠岫疎雨過平林不
見輪蹄跡惟聞鐘磬音何當去城市來此極招尋

僧舍煙雲表人家木石中亂山迷遠近流水遠西東犬
吠穿蘿月猿鳴落葉風曾逢隱人說廬阜路相通

度壑飛流急緣溪狹徑長松杉圍古寺鷗鷺下迴塘舊

訝周顒隱今無賀監狂惟餘林下叟淳朴似虞唐

山峻容過鳥溪深隱釣舟平生不到處今日偶來遊迤
逦踰青障招尋近翠樓桃花流水暮歸路使人愁

路僻無忙步林空有遠情幽尋行復坐詩緒亂還清水
到荒磯絕雲依野樹生何時休世念來與爾同盟

名郡浙東西耶溪與雪溪水平吳地落潮長越山低楊
柳藏鴉密芙蓉隱棹齊何當尋賀監來往日攀躋

成化甲辰七夕立秋有作

立秋逢七夕不減歲朝春天上佳期協人間俗事新炎
涼俄代序時節併催人蕭瑟梧桐葉相隨野鵲頻

聞蕭姨訃慰內

只記生離日那知死別年素懷常自省真信托誰傳姊
妹雙成念夫妻未了緣從今東海月空照薊門煙

水竹圖

漠漠孤煙合盈盈一水深汗青誰涉採荷菜自行吟野
色將秋思江聲併夕陰可憐桃李月風雨斷幽尋

松泉軒

松葉緣溪密山泉夾岸流雲深常蔽戶石磯僅通舟鶴
宿庭中月厨分澗底秋曾逢軒下客為說似玄洲

五色牡丹

五色名皆具千金價不賒相看真似錦比美更無花瑞
鳳銜天詔祥雲夾日華沉香亭久廢變態更誰家

挽宋舉人

四舉皆不偶一生良苦辛貧無青眼客死負白頭親牢

落愁中事悲涼夢裡身生平清誼在腸斷故交人

竹林七賢

深竹暗浮煙羣公樂事偏高情動寥廓清論入微玄豈
是巢由侶何如沮溺賢其誰匡典午勲烈照遺編

坡翁雪月二竹

歲晏暮山深瀟瀟雪滿林影偏銀鳳下聲細玉龍吟獨
抱平生節誰同末路心惟應松栢樹寒日共蕭森
明月照幽篁天空夜氣涼繁陰連密地清影亂疎行雨

雪傷遲暮風煙怯老蒼何如今夜景瀟灑勝浮湘

至德清有作

野樹荒煙路重來十五年溪山如有待人物故依然
漁火明寒浦菱歌起暮船長橋今夜月桑梓影重圓

酬張篴用來韻

自廢登山屐長懷漉酒巾風雲遊子暮魚鳥故園春
聽雨興思遠臨池得句頻林泉高致在詞翰近尤新

重遊金粟寺有作

溪深通小艇山峻路層臺
林葉經霜盡河冰近午開
雲僧出定舊雨客重來
擾擾浮生路經過知幾迴

舟次濟寧遇雨寄孫廷昭大參

一自同官後于今又幾年
相逢真偶爾分手各依然
舊事憑誰問新詩覓鴈傳
天涯不可極煙雨過前川

草庭

幽亭何寂寞
閒芳草不知名
花落東風淡
鶯啼暮雨晴
閒中隨意綠
空裡過愁生
惟有濂溪趣
年年任化成

憶母

慈母歿七載癡兒尚一身天涯常有月堂北更無曉
虛室鷄羣散荒園野苧貧平生勤苦事日遠益悲辛

唐安八景為尹朴之賦

東湖夜月

雲淨水悠悠空明一色秋夜涼珠淚重風淡桂香幽
放浪袁宏渚清真庾亮樓其誰泮宮裏登屋候西流

高閣紅梅

寂聞古城東猶遺雪後紅人無前日興花異舊時容遠
道憑誰寄新詞愧未工綠陰高閣下零落負春風

天目曉鐘

山閣樹冥冥潮音振海生斷依殘漏盡喧襍曙鳥鳴遠
夢驚長樂迷途想化城如何長往客猶著夜衣行

市橋官柳

風暖乳鶯啼春來處處齊晴連官道狹寒暝酒帘低搖
落應相待繁華莫自迷猶勝離別恨生長灞橋西

西江晚渡

天晚路悠悠歸心急暮投水聲喧語笑人影亂浮漚誰
聲中流揖猶閒野渡舟濟川須及蚤斜日下滄洲

白塔斜陽

野色荒涼處山空日未沉僧歸黃葉寺犬吠白雲林塔
影凌秋霽鍾聲送夕陰無因駐清景餘興得幽尋

前村牧笛

宵靄山村靜悠揚草路遙調高初上隴聲近漸臨郊落

日凝寒岫悲風動柳條
太平民事好日日換新詔

岷山晴雪

古澹色常在蒼茫勢欲崩
陰風吹不盡寒日照還凝
夏迹懷神禹唐章重少陵
豐年欣有象佳興會堪乘

龍江八景為康僉憲題

南畝農耕

沃土饒生意芳村托比隣
西城初卒歲東作又乘春
食力真吾事全生仰至仁
此鄉深化育應有帶經人

北山儒隱

盛世多才逸山居近市喧不矜高士節聊托野人羣
絃誦消寒暑柴桑見子孫如何冥寂士薄暮起移文

石橋秋月

白石卧滄波冰輪度玉河地高秋影重天近夜涼多
清賞誰將共幽懷奈爾何會逢題柱客同和謫仙歌

龍穴曉雲

神物何年化行雲日靄然靈氛逮石洞翔影落沉淵
豈

是無心出何因有夢傳田家鎮相望霖雨自年年

尖峰樵唱

雲重碧山深行歌度遠林迴風傳逸響空谷振流音勞
苦還相和招呼擬共尋聞歌盡回首誰會買臣心

橫浦漁舟

疎柳繫扁舟年年水上頭雨晴人共發風急夜相留酒
伴多同醉船居未解愁此生聊復爾何用著羊裘

山寺晴嵐

縹緲帶春霏山深野寺微
淡隨香靄散濃暎雨花飛
困鶴驚茶竈閒僧閉竹扉
明朝去遊覽擬著薜蘿衣

獨岡晚照

孤絕羣山外斜陽落未沈
餘光迷鳥陣流彩入楓林
曠望愁將夕昏黃思不禁
桑榆景猶好誰肯惜分陰

題姚公綬山水小幅

幽意寫不盡萬山深更深
白雲無出處綠樹漫成林
啼鳥醒人夢流泉淨客心
何當隨釣艇看弈草堂陰

夢劉公瑞

形影久云絕連宵頻夢君布衣仍潦倒病髮亂繽紛似
別驚相見將言悄不聞平生最深契夢斷一銷魂

送陳知縣

共說難兄弟才華信合并龍光雙劍白鶴夢一種青檀
學諸王字能通大戴經鳴琴花縣日春滿卓公庭

舊朝靴

記得初成日先朝禁直臣動移當輦轂步履上星辰待

漏清霜滿乘春玉鐙新舊縫時綻裂猶有玉堦塵

戊辰中秋日得舍弟歸信已至江口

宦跡茫無際歸期定已聞素懷同月滿積思共秋分漢
傳功名異眉翁骨肉存白頭俱永感臨見却銷魂

吳孟章自樂山八景

野仙居

自有丹丘地疑逢萼綠華繞門多擲葉臨水盡桃花不
類人間世真成方外家平生出塵想蓬褐更清嘉

老農窩

莘野無餘業成都有薄田茅簷容犬宿草具近牛眠炊
借隣家竈烹分土窟泉西成與東作歲歲此盤旋

留雲亭

山近氣常聚林深風漫吹非因朝作夢因為雨催詩牕
慢垂還入爐薰散不移從龍今出岫舒卷共相宜

得月澗

一碧淨無塵清秋月滿輪天空光亂水風蕩影移人舉

金剛山志卷六
酒邀何及登樓賞厭頻嬋娟長在目幽絕異通津

引泉渠

疏鑿近山陂開雲導玉脂岸迴斜沁圃石轟細通池溪
雨漲來急野花流到遲因之想清渭欲訪鄭當時

青華洞

地遠芳林匝巖開側徑紆雲扉風鏤靜羅幔月燈孤偶
此尋丘壑憑誰入畫圖曾逢異人說深處似蓬壺

紫煙臺

突兀承蒼漢空蒙生紫煙登臨飛鳥上望到夕陽邊氣
接雲林洞光涵月澗泉香爐峯下景同此類超然

蠹魚軒

墨氣濃侵辨蟲痕細繞邊自因當膝破無復可人懸竹
汗消遺簡芸香落斷編茶搜并日晒莫笑腹便便

雲峯東麓

題林侍御
墓一首

生孩尋失父成莖荷堯夫天啟三公地人嗟五父衢西
原喬梓合北隴鳳鸞孤想見焚黃日還應哭幼雛

山溪晚興

樹色逢秋淡山光薄暮佳
吟看風墮葉坐覺水生花
野景周遭在幽情一倍加
日斜人不見惟有過林鴉

翠巖

松栢連崖岫軒牕匝薜蘿
門臨蒼玉案人在綠雲窩
路入三茅洞行經七葉坡
日斜天宇淨空碧罩青螺


半閒

動裏心常靜忙中樂自由
租庸長預了子姓早分憂
事

辦多臨弈耕餘便出遊何如賈秋壑名地總虛浮

送侯方伯赴河南

聖主念生民雄藩列重臣金章辭玉闕寶馬曳朱輪南
粵仁恩在中區事業新會看嵩嶽裏幽谷發陽春



方洲集卷六